


Plumalhon

MAINATGES

D'ÒC



La tortuga



Lo Fantastí



Los ponts

N° 57

Novembre de 2001

Plumalhon

35 F (5,34 €)

ISSN 1264-6733

Lo facochèr

Es un cosin del nòstre singlar d'Euròpa. Demòra dins las savanas de Mozambic, de Senegal, d'Etiopia e de Somalia.

Es pas polit !

Dison qu'es pas polit amb son cap tant especial, qu'a una bòça de cada costat e coma doas verrugas gròssas jols uèlhs. De segur, las doas defenses que li sortisson de la boca li balhan de personalitat ! N'a un autre parelhat viradas en jos. Quand s'esquiçan, venon d'armas talhantas redotablas. Lo facochèr pòt far 75 cm d'auçada e pesar unes 140 quilòs.



Manjar e servir de dinnar

Los facochèrs fan coma lors cosins los singlars. Fotjan, modilhan la tèrra amb lo morre per cercar de tuberculs. Se noïsson d'èrbas tanben, solament causisson las melhoras. Per pàisser, s'agenolhan per aver lo gronh al ras del sòl. Mas lor arriba de se far manjar. Los leons e los leopards, lor agrada de dinnar amb un facochèr. Per s'aparar, ensajan de trobar qualque cròsa abandonada o qualque trauc e i dintran de cuols. Amb lors defenses agusadas coma de cotèls, pòdon espaurugar los atacants.



En familha !

La femèla a de mauradas de 3 o 4 pichons. Los noïris e los apara dels dangièrs.

Los facochèrs an pas bona vista mas an l'aurelha fina e mai an bon nas. Los mascles vivon amb la familha mas quand son tròp vièlhs estiman mai viure sols. Sovent, la familha se compausa d'un mascle e d'una femèla e de doas o tres mauradas de pichòts facochèrs.

Tèxte et fotos Fred Lavail

